

Fasnacht 2011



2 Drupfuscher

syt: 1950

Sujet: Quo vadis, Böögg? oder Asyl am Rhygney?

Zem Gligg isch em Zeedelschryyber das Sujet doo yykoo, eso nyt saagend und doch mit meegligem Diefgang...?
„Quo vadis, Böögg?“ het nyt z'due mit „Zapfe fliege loo“.
„Wo gooht's aane?“ isch d'Froog, vo däm Schwaanegsang.

Dr Böögg, e Schneemaa, e hohle Kopf mit Pulver gstopft, e Schytterhuffe, huushooch biige, me duets aazynde, sait schyynts, wenn's uff em Fyyr lutt glepft, wie scheen as s'Joor sott wäärde, nur kaine kaa's begrinde.

Dä Bsuech bi uns macht, wenn au numme de Initiante, im erschte Aasatz Fraid und hilft dr Zyytig as Spaltefiller. Im Dreyspitz git's, e kuurlige, scho fascht intrigante Yyblig zem Thema, Mentsche, Wäält und Klima – Killer.

Wanderhelge, abgspäggt, aabasst uff die scheeni Schwyz, zwai, drey glaini Zaigefinger, was alles schreeg und lätz. (z.B. Atoom -Schtroom, goot symbolisch voll ins Gryz) Scho sait dr Sponsor AXPO: „Hee, dasch nit woor, stryched doo die Sätz!

Und es wiird gstriche - - - - - ... soovyl zem Thema „Muet“! Do schyynt doch fyr e Mool, hän d' Ziircher doo mee Zupf, au wenn sii nur dää wyssi Kopf mit Huet noo Basel gänn, das bruucht vo deene scho e bitzli Pfupf.

Laider isch Zivilcourage und Bschaidehait nimmi Drumpf. Mir mien ys alli an dr Naase nää und aafoo dängge. Nit Politigg und Waale, mache weeniger Drägg und Sumpf. Nai, du und ych sin d' Deppe, wo speetere Generatioone e myysi Wäält dien schängge !

Wie haisst's so scheen...wäär weeniger nit mee ?
Denne gääb's vilicht kai Hunger...
Denne gääb's vilicht mee Schnee...
Denne gääb's vilicht weeniger Grieg und Kummer...
Denne bruucht's vilicht scho weeniger Asyl...
Denne gääb's vilicht mee guets Dringgwasser...
Denne gääb's vilicht weeniger Angscht und Ghyyl...

Versteen die, wo uns glaube mache, e „X“ wäär doch e „U“?
Versteen's die digge Gäldsegg, Grooskepf und ...
verschoosch's am Änd au **DU** ?

Em Zyschdig isch Latäärne Usstellig uff em Minschterblatz und d' Waage/Reggwisyte Usstellig bi dr Kasäärne. Deert sin au drey CINS – Ständ wo me kaa Zeedelbindel und dr Rädäbäng kaufe.